



*Saint Jean presche le Baptisme de penitence, vivant avec austerité,
preparant la voye du Seigneur.*

EN l'an quinziesme du regne de Tibere Empereur Romain, Jean Baptiste fils de Zacharie, preschoit au desert de Iudée, disant ; Faites fruits de penitence proportionnez à vos pechez, car le Royaume de Dieu est prochain. C'est cestuy-cy dont Esaye auoit predict : La voix de celuy qui crie au desert, Preparez la voye du Seigneur, faites ses sentiers droits. Il auoit son vestement de poil de chameaux, & sa ceinture de peau, vivant de sauterelles, & de miel sauvage. Or quand il vid plusieurs Pharisiens & Sadducéens venir à son Baptisme, il leur dit, Enfans de viperes, qui vous a aduisez de fuir l'ire de Dieu à aduenir ? faites donc fruits dignes de repentance, ne presumez point d'estre enfans d'Abraham. Puis leur dit ; La coignée est ja mise à la racine des harbres, partant tout arbre qui ne fait bon fruit sera coupé & ietté au feu. Vray est que ie vous baptise d'eau de repentance ; mais celuy qui vient apres moy, duquel ie ne suis digne de deslier la courroye du soulier, vous baptisera du S. Esprit. Jean donc Precurseur de Iesus-Christ a exhorté chacun à faire son deuoir, à subuenir par charité mutuelle aux souffreteux, disant aux Peagers, N'exigez rien de personne outre ce qui est ordonné : & aux gens-d'armes, Ne tourmentez aucuns, & vous contentez de vos gages.

S. Matthieu 3. Chap. S. Luc 3. Chap. S. Marc 1. Chap. S. Jean 3. Chap.